

taaoao i te parau mai e; "e aha nei ra hoi, e ere a tahi nei, e ra roa aè nei, àore a i papu o te parau mau e tae roa mai nei, no Ben Barka, Markovic, De Broglie, Boulin, te manu reva imi mori arahu,.. tapoipoi-noa-hia te parau mau. Areà te Evaneria ra, te titau noa ra ia, ia afahia te mau mea atoà i te vahi maramarama e tià ai.

4- O Rosalie Bertell i Tahiti nei, rauti patoi i te atomi i to na fenua marite, e hoè parau pia na te mau avanaa Niu-Terani no nià i te mau tamataara atomi i Moururoa, oia, taua atomi nei a. Mea nanea te mau fairaa parau, àore ra e hioraa papu, e mea ravai atoà te mau uiraa e faatupu i te àehuèhu. I te pae farani tei te fairaa parau ihoa ia te haapaarii-raa, àore ra e hioraa papu, no reira e faaea muhu ore noa e te mau uiraa. Ahiri pai tera ra te feia maimi e faati-hua mai na i to ratou tiâturi e to ratou hepohepo mai to te farani e tae noa atu i to te Niu-Terani, teie ia e hinaarohia nei.

Aita ra, teie atoà ia e arato anaè nei ia ù i roto i teie umeumeraa no te patoi àore ia farii i te atomi, e ere hoi te reira i ta ratou tuhaha, no roto ra i te manao àau e te parau a te Atua... A hani, ua manaochia anei hoi e faòo atu e te nahea ra te Evaneria no te atomi ?

#### Légende :

"Maru Ata" i Punaauia i te P.K 17.

\* I nanahi ra, e fenua fetii teie, i teie nei, e fenua vavahihia, tapao ia e ua amahamaha te opu fetii.



# TE HOORAA FENUA

Maohi i teie mahana, papaâ i nià i to na iho fenua a nanahi.

I te taime a tupu ai te rururaa a te Apooraa Rahi a te Etaretia Evaneria, ua horoâ te mau mero i tae mai i taua putuputuraa ra, to ratou manao tapitapi i mua i te aro o te feia mana faatere o te hau fenua. E peu matarohia ihoa teie huru fariiraa. Ua haamata mai te reira i te tau a mana mai ai o Flosse tane e ta na pupu poritita.

I te avaè Atete i mahemo ia tatou, e i raro aè i te peretiteniraa a Marurai Utia, ua tuatapapahia te hoè tumu parau, oia hoi te parau no nià i te tereraa o te fenua. Aita ra te Apooraa Rahi i heheu i te taatoaraa o te mau manao e vai ra. E rave rahi manao e nehenehe e heheu, no te poto ra te taime farereiraa, ua tuatapapa-noa-hia e toru tumu parau :

- Te ohipa a te Notera
- Te taniuniuraa fenua
- Te

E rave noa mai tatou i te tumu parau hopeà, oia hoi te horoâraa fenua. E mea tano ia ite mai outou e ere o teie anaè, e tae mai a te feruriraa no teie tumu parau i roto i te veà i muri nei.

E tapao te reira aita te Etaretia e faaea muhu-ore i mua i te fifi e te ravai ore. Te ora o te Etaretia, tei roto ia to na hui-faaroo. I teie mahana ua riro roa te hooraa fenua ei uiraa hohonu, e ei feruriraa no na. E tià ia tatou ia parau, e aita ta na e taotiâraa i te hiâ. Patoi anei o ia i te reira, aore ra farii anei o ia i te maute i haamauhia e te feia mana, teiè mau ture e paruru nei te hooraa fenua ? Te vai ra anei te hoè mahana e parau ai o ia e, e mea tano ia rave

faahouhia te faanahoraa tumu a te Maohi no te paruru ia na. Ei aha e tipee faahou a i ta te papaâ.

Hoi mai na tatou i nià i te tumu parau no teie veà, oia hoi te hooraa fenua. E ere i te mea ohie ia hio atu na rapae mai te útuafare maohi, vavahi i to na faufaa fenua, e i muri i te vavahiraa na roto i te hoè taime poto roa, hoo atu ra i to na tuhaha. Te moni i roaâ mai, vahihou atu ra te reira i te afata moni mai te Socredo, ..., e haaputu atu ra, ... e i muri mai hoo atu ra i te pérroo uira, te viteo e rave rahi atu a... Outou, te feia porotetani, e parau mau te parau e, e oaoa te roaâ mai, e teoteo atoà ra. A feruri maitai, e tupu atoà mai te mauiui e te tai i roto i te tahi atu mau taata. Te nahea nei outou i ta outou faufaa fenua i fatuhia mai e outou mai roto mai i to mau tupuna. Ua moè anei ia outou i te aratairaa a te hui-tupuna. Te hoè taata aita o ia e fatu faahou nei i te fenua, e hotu painu o ia.

E mea na hea o vera i te fatu ai i te fenua ? Na roto i te hooraa ? Aita roa atu ia ! Na roto ra i te tau a tomitehia ai te fenua.

I mua ra, te ioà ta ratou i tapao i nià i te parau fatu fenua no roto mai i te paraua tupuna. Ei haapapuraa ia i te parau e, teie fenua e tomite nei au, e riro ia ei metua no ù. Te uiraa matamua, ia hoo atu outou i to outou iho tuhaha fenua, aita anei outou e hoo nei i te peu tumu a to outou tupuna ? Aita anei outou e faaere ia outou iha Tei roto te numaa maohi i te fifi e te hepohepo. I to na pae, e tiâraâ maiatai to te feia fatu rahi nei i te tuhaha fenua. Taata faahiahia no te mea aita e fifi no te opere

te reira. Te vai ra ihoa te matahiapo... e hinaaro ra e tanu i te maa, e faahotu te repo... Tera ra, te iti noa ra taua útuafare maohi ra. A ara maitai, ia hoo atu outou i rapae i te opu hoè, e iti atoà mai ia te faufaa fenua a te opu hoè. Ia iti mai te reira, e àti ia no te ope-re na te huuai, no te mea ua huâhuâ roa te faufaa fenua. Hapehape anaè, e pau roa te fenua i te hoo, aore ra e mea iti roa te toe mai. A pahono mai na ; e nehenehe anei ta teie taata viivii e rave mai te tahi tuhaha fenua è atu. Noa atu to na itoito, aita ihoa ta na moni e ravai no te hoo mai. Tei nià roa te faito moni fenua i te hoè faito teitei, eita e pee ia na ia aufau. E te huuai, haere ra ia ratou i hea, faaa noa ia i roto i te mau fare tarahu.

No reira, aita atu e parau a feruri maitai. I mua ra o oe e te numaa maohi te fatu o teie àia. Parau mau roa no teie tau, e mea taaè ihoa te oraraa ta tatou e ora hepohepo nei. Te tumu i taaè ai te oraraa, tei roto noa te reira i te tereraa o te fenua. A hio na i pihaihi o to oe no-horaa, e rave rahi mau tuhaha oire, mau tua aivi e fatuhia ra e te feia no rapae mai. No to oe nounou i te moni, hoo atu ra oe i te fenua. Aita hoi oe i ineine, aita hoi oe i maramarama.

#### Opaniraa :

I te mahana a haere mai ai te peretiteni o te hau fenua, i faaroohia ai to na reo ma te parau papu e, a tiâturi mai, te hiopoâ maitai nei matou te hooraa fenua.

I roto i te veà i muri e tao mai a outou i te tahi mau manao. Na tatou ra e feruri.

Tetiarahi G.

